

Na osnovu člana 15. Zakona o Upravi za indirektno oporezivanje ("Službeni glasnik BiH", broj 89/05) i člana 61. stav 2. Zakona o upravi ("Službeni glasnik BiH", broj 32/02), a radi provođenja carinskih i poreskih oslobođenja iz člana 26. Okvirnog sporazuma između Bosne i Hercegovine i Komisije Evropskih zajednica o pravilima saradnje koja se odnosi na finansijsku pomoć Bosni i Hercegovini u okviru pružanja pomoći putem instrumenata pretpristupne pomoći (IPA) ("Službeni glasnik BiH - Međunarodni ugovori", broj 6/08), a uz saglasnost Delegacije Evropske komisije u Bosni i Hercegovini, od 03. aprila 2009. godine, direktor Uprave za indirektno oporezivanje, d o n o s i

INSTRUKCIJU

**o postupku ostvarivanja carinskih i poreskih oslobođenja u skladu sa
Okvirnim sporazumom između Bosne i Hercegovine i Komisije Evropskih zajednica
o pravilima saradnje koja se odnosi na finansijsku pomoć Bosni i Hercegovini u
okviru pružanja pomoći putem instrumenata pretpristupne pomoći (IPA)**

GLAVA I - OPŠTE ODREDBE

Član 1. (Predmet)

Ovom instrukcijom se propisuje postupak ostvarivanja prava na oslobođenje od plaćanja uvoznih dažbina i poreza na dodatu vrijednost (u daljem tekstu: PDV) pri uvozu, odnosno stavljanju robe u slobodan promet u carinsko područje Bosne i Hercegovine (u daljem tekstu: BiH) i oslobođenje od plaćanja PDV-a pri nabavi dobara i usluga u BiH, a u skladu sa članom 26. Okvirnog sporazuma između Bosne i Hercegovine i Komisije Evropskih zajednica o pravilima saradnje koja se odnosi na finansijsku pomoć Bosni i Hercegovini (u daljem tekstu: Okvirni sporazum) u okviru pružanja pomoći putem instrumenata pretpristupne pomoći (IPA).

Član 2. (Ostvarenje oslobođenja)

Oslobođenja navedena u članu 1. ove instrukcije ostvaruju se pri provođenju ugovora u okviru projekata koji se finansiraju iz IPA fonda u skladu sa Okvirnim sporazumom.

GLAVA II - OSLOBAĐANJE OD PLAĆANJA UVOZNIH DAŽBINA I PDV-a PRI STAVLJANJU ROBE U SLOBODAN PROMET

Član 3. (Oslobođenje od plaćanja uvoznih dažbina i PDV-a)

(1) Roba koja se u okviru projekata koji se finansiraju iz IPA fonda uvozi i stavlja u slobodan promet u carinsko područje BiH, oslobođena je od plaćanja uvoznih dažbina (carine, carinskog evidentiranja) i PDV-a prema članu 26. stav (2) tačka a) Okvirnog sporazuma.

(2) Lični predmeti i predmeti za domaćinstvo za ličnu upotrebu, koje uvoze fizička lica (i članovi njihovih najužih porodica), osim onih angažovanih lokalno, koja su angažovana za obavljanje poslova definisanih ugovorima o tehničkoj saradnji, oslobođeni su od plaćanja uvoznih dažbina (carine, carinskog evidentiranja) i PDV-a prema članu 26. stav (2) tačka d) Okvirnog Sporazuma, s tim da lični predmeti i predmeti za domaćinstvo budu ili ponovo izvezeni ili prodati u državi u skladu sa propisima na snazi u BiH, nakon prestanka ugovora.

(3) Oslobođanja navedena u stavu (1) i (2) ovog člana ostvaruju se kod carinske ispostave na području BiH kojoj je predložena roba koja je predmet oslobođanja, kod koje ispostave korisnik oslobođanja podnosi sljedeća dokumenta:

a) za oslobođanje iz stava (1) ovog člana:

- 1) carinsku prijavu (JCI) za stavljanje odnosne robe u slobodan promet (šifra postupka "4200" u prvoj potpodjeli polja 37), koja se smatra i zahtjevom za oslobođanje, popunjenu u skladu sa propisima o popunjavanju carinske prijave, te uz upisivanje u drugoj potpodjeli polja 37 carinske prijave šifre "210" (šifra za oslobođanje od plaćanja uvoznih dažbina i PDV-a u okviru IPA prema članu 26. stav (2) tačka a) Okvirnog sporazuma),
- 2) pravilno popunjenu i ovjerenu Potvrdu za oslobođanje od plaćanja uvoznih dažbina i PDV-a pri uvozu robe, izdatu u skladu sa članom 6. ove instrukcije, na obrascu iz Priloga 1. ove instrukcije. Kontrolni broj navedene potvrde mora biti upisan u polju 44 carinske prijave i to uz šifru dokumenta "IPA" i
- 3) specifikaciju robe iz uvoza, na koju se odnosi potvrda iz alineje 2) ove tačke, a koja sadrži podatke i ovjeru navedenu u članu 6. stav (2) tačka a) ove instrukcije. Ova specifikacija podnosi se u dva originalna primjerka, od kojih jedan primjerak carinska ispostava, nakon ovjere (uz označenje broja i datuma odnosne carinske prijave), vraća korisniku oslobođanja, a drugi zadržava uz carinsku prijavu,

b) za oslobođanje iz stava (2) ovog člana:

- 1) carinsku prijavu za stavljanje odnosne robe u slobodan promet (šifra postupka "4200" u prvoj potpodjeli polja 37), koja se smatra i zahtjevom za oslobođanje, popunjenu u skladu sa propisima o popunjavanju carinske prijave, te uz upisivanje u drugoj potpodjeli polja 37 carinske prijave šifre "211" (šifra za oslobođanje od plaćanja uvoznih dažbina i PDV-a u okviru IPA prema članu 26. stav (2) tačka d) Okvirnog sporazuma), osim za robu koja može biti stavljena u slobodan promet uz oslobođanje od plaćanja uvoznih dažbina i PDV-a na osnovu usmene carinske prijave,
- 2) potvrdu izdatu od Delegacije Evropske komisije u BiH (u daljem tekstu: EK), a kojom se potvrđuje da je korisnik navedenog oslobođanja angažovan za obavljanje poslova definisanih ugovorom o tehničkoj saradnji u okviru IPA i
- 3) spisak robe koja se uvozi, potpisan od strane korisnika oslobođanja, u dva primjerka, od kojih jedan primjerak carinska ispostava, nakon ovjere (uz označenje broja i datuma odnosne carinske prijave), vraća korisniku oslobođanja, a drugi zadržava uz carinsku prijavu.

(4) Ako se uvoz robe po osnovu oslobođanja iz stava (1) i (2) ovog člana ne vrši odjednom, nego sukcesivno, za istu se, kod svakog pojedinačnog uvoza, carinska prijava iz stava (3) ovog člana podnosi kod iste carinske ispostave kod koje je prvobitno započet postupak uvoza i oslobođanja, koja ispostava će pratiti uvoz robe putem sukcesivnog otpisa vrste, količine i vrijednosti robe koja se uvozi po svakoj carinskoj prijavi, uz označenje broja i datuma odnosne carinske prijave na podnijetoj specifikaciji robe iz uvoza, odnosno spisku robe.

(5) Odluku o oslobođanju od plaćanja uvoznih dažbina i PDV-a po podnijetoj carinskoj prijavi iz stava (3) ovog člana, carinska ispostava donosi u vidu zabilješke u polju C (npr. "Oslobođeno po čl. 26. stav 1. tačka a) IPA Okvirnog sporazuma" ili "Oslobođeno po čl. 26. stav 1. tačka d) IPA Okvirnog sporazuma", u zavisnosti koja situacija je u pitanju), ako podnijeta carinska prijava i uz nju priložena dokumenta sadrže sve potrebne podatke i zahtjev korisnika oslobođanja se u cjelosti usvaja. Navedenu zabilješku carinska ispostava treba unijeti i u inspeksijski akt odnosne carinske prijave.

(6) Roba iz stava (1) i (2) ovog člana, koja je pri stavljanju u slobodan promet oslobođena od plaćanja uvoznih dažbina i PDV-a, ne smije se koristiti u svrhe različite od svrhe za koje je odobreno navedeno oslobođanje, bez prethodne obavijesti nadležnog carinskog organa i plaćanja uvoznih dažbina i PDV-a od strane korisnika oslobođanja.

GLAVA III - OSLOBAĐANJE OD PDV-a PRI NABAVCI DOBARA I USLUGA U BiH

Član 4. (Oslobađanje od plaćanja PDV-a)

(1) U skladu sa odredbama člana 26. stav (1) tačka b) Okvirnog sporazuma i člana 29. stav 2. Zakona o porezu na dodatu vrijednost ("Službeni glasnik BiH", broj: 9/05, 35/05 i 100/08), isporuke dobara i usluga u BiH u okviru projekata koje finansira Evropska komisija putem IPA oslobođene su od plaćanja PDV-a.

(2) Oslobađanje od plaćanja PDV-a navedeno u stavu (1) ovog člana se ostvaruje na osnovu pravilno popunjene i ovjerene Potvrde o oslobađanju od plaćanja PDV-a, izdate u skladu sa članom 6. ove instrukcije, na obrascu iz Priloga 2. ove instrukcije.

Član 5. (Izdavanje fakture)

Registrovani poreski obveznik - isporučilac dobara i usluga iz člana 4. ove instrukcije izdaje fakturu bez obračuna PDV-a. Faktura obavezno mora sadržavati i klauzulu: "Oslobođeno od plaćanja PDV-a u skladu sa članom 29. stav 2. Zakona o porezu na dodatu vrijednost".

GLAVA III - POSTUPAK OVJERE POTVRDE O OSLOBAĐANJU OD PLAĆANJA UVOZNIH DAŽBINA I PDV-a

Član 6. (Postupak ovjere potvrde)

(1) Po potpisivanju ugovora u okviru IPA, EK uručuje ugovaraču odgovarajući primjerak Potvrde iz člana 3. stav (3) tačka a) alineja 2) ili iz člana 4. stav (2) ove instrukcije, zajedno sa detaljnim uputama o proceduri oslobađanja na koje se uručeni primjerak Potvrde odnosi.

(2) Ugovarač koji je primio sredstva iz IPA fonda, EK podnosi popunjenu odgovarajuću Potvrdu u tri istovjetna primjerka i sljedeće:

a) uz obrazac "Potvrda za oslobađanje od uvoznih dažbina i PDV-a pri uvozu robe", jednu profakturu robe koja se uvozi, specifikaciju robe koja se uvozi u tri primjerka, koja treba da sadrži podatke o vrsti, količini i vrijednosti robe koja se uvozi, potpis i pečat uvoznika i/ili isporučioaca robe, naziv, ime i pečat krajnjeg korisnika robe, kao i prazan prostor za potpis i pečat nadležnog ministarstva (za ovjeru specifikacije robe prije uvoza robe), kao i originalnu izjavu krajnjeg korisnika robe koja se uvozi,

b) uz obrazac "Potvrda za oslobađanje od plaćanja PDV-a", jednu original fakturu.

(3) EK na odgovarajućoj Potvrdi, na svim primjercima, upisuje kontrolni broj. Jedan kontrolni broj, tj. jedna Potvrda treba odgovarati jednoj fakturi, odnosno profakturi, bez obzira koliko ona ima stavki (vrsta robe). Poslije provjere od strane voditelja projekta EK, osoba ovlaštena od strane EK potpisuje i stavlja pečat EK na sva tri primjerka Potvrde. Nakon toga, u zavisnosti za koje oslobađanje se izdaje Potvrda, EK zadržava:

a) za uvoz robe - jedan primjerak Potvrde i kopiju specifikacije robe iz uvoza, a preostala dva ovjerena primjerka Potvrde i sve originalne primjerke specifikacije robe vraća ugovaraču, od kojih jedan primjerak Potvrde sa pripadajućom specifikacijom robe u dva primjerka (ovjerene od strane nadležnog ministarstva) prilaže uz carinsku prijavu iz člana 3. stav (3) tačka a) ove instrukcije, a ostalo zadržava za vlastitu evidenciju,

b) za nabavku dobara i usluga u BiH - jedan primjerak Potvrde, a preostala dva primjerka Potvrde vraća ugovaraču od kojih jedan primjerak zadržava za vlastitu evidenciju, a drugi primjerak daje prodavcu robe ili usluga koji mu je izdao fakturu bez PDV-a u svrhe kontrole.

Član 7.
(Evidencija i izvještaj)

(1) EK će voditi službenu evidenciju o izdatim Potvrdama iz člana 6. ove instrukcije.

(2) EK će, do 20-tog u mjesecu za prethodni mjesec, dostavljati Odsjeku za pružanje usluga poreskim obveznicima u Regionalnom centru Sarajevo mjesečne izvještaje o izdatim Potvrdama za oslobađanje od plaćanja PDV-a, koji će sadržavati slijedeće informacije:

- a) kontrolni broj,
- b) broj, datum i vrijednost ugovora potpisanog između EK i ugovarača,
- c) naziv projekta koji se finasira iz IPA fonda,
- d) naziv ugovarača, njegova adresa i PDV broj (ukoliko ga ima),
- e) naziv predstavnika stranog ugovarača i njegov PDV broj,
- f) naziv prodavca dobara i usluga, njegova adresa i PDV broj,
- g) broj i datum fakture,
- h) ukupnu vrijednost nabavljenih dobara ili usluga u KM valuti, predmet Potvrde za oslobađanje od PDV-a.

GLAVA IV - PRELAZNE I ZAVRŠNE ODREDBE

Član 8.
(Povrat plaćenog PDV-a)

Ugovarač koji je, prije stupanja na snagu ove instrukcije, već platio PDV u okviru implementacije projekata koje finansira Evropska komisija putem IPA, plaćeni PDV biće predmetom povrata u skladu sa članom 29. stav 1. tačka 4. Zakona o porezu na dodatu vrijednost.

Član 9.
(Sastavni dio instrukcije)

Sastavni dio ove instrukcije čine Prilog 1. (Obrazac Potvrde o oslobađanju od plaćanja uvoznih dažbina i PDV-a pri uvozu robe) iz člana 3. stav (3) tačka a) alineja 2) ove instrukcije i Prilog 2. (Obrazac Potvrde za oslobađanje od plaćanja PDV-a) iz člana 4. stav (2) ove instrukcije.

Član 10.
(Stupanje na snagu)

Ova instrukcija stupa na snagu osmog dana od dana objavljivanja u "Službenom glasniku BiH".

Broj: 01-02- 2-1152 /09
Datum, 27.06 2009. godine



Prilog 1.

**POTVRDA ZA OSLOBAĐANJE OD PLAĆANJA UVOZNIH DAŽBINA I PDV-a
PRI UVOZU ROBE U OKVIRU PROJEKATA KOJI SE FINANSIRAJU IZ IPA FONDA
U SKLADU SA OKVIRNIM SPORAZUMOM
("Službeni glasnik BiH - Međunarodni ugovori", broj 6/08)**

Kontrolni broj:

I IPA Finansijski sporazum zaključen između Evropske komisije i BiH

Broj i datum zaključivanja:

Vrijednost ugovora:

II Ugovor potpisan između Evropske komisije i ugovarača

Naziv projekta:

Broj i datum zaključivanja:

Vrijednost ugovora:

Mjesto izvođenja: Bosna i Hercegovina

a.) Izvođač projekta/domaći ugovarač

Adresa:

Sjedište:

PDV broj (ukoliko ga ima):

b.) Izvođač projekta/strani ugovarač

Adresa:

Predstavnik u BiH:

PDV broj:

III Uvoz robe

Krajnji korisnik robe:

Vrijednost robe koja se uvozi:

Broj i datum profakture:

Broj listova i stavki specifikacije robe:

Ovjera podnosioca zahtjeva

Mjesto i datum:

Odgovorna osoba:

Potpis i pečat:

Ovjera Evropske komisije

Mjesto i datum:

Odgovorna osoba:

Potpis i pečat:

**POTVRDA ZA OSLOBAĐANJE OD PLAĆANJA PDV-a
ZA SNABDIJEVANJE DOBRIMA I USLUGAMA
U OKVIRU PROJEKATA KOJI SE FINANSIRAJU IZ IPA FONDA
U SKLADU SA OKVIRNIM SPORAZUMOM
("Službeni glasnik BiH - Međunarodni ugovori", broj 6/08)**

Kontrolni broj:

I IPA Finansijski sporazum zaključen između Evropske komisije i BiH

Broj i datum zaključivanja:

Vrijednost ugovora:

II Ugovor potpisan između Evropske komisije i ugovarača

Naziv projekta:

Broj i datum zaključivanja:

Vrijednost ugovora:

Mjesto izvođenja: Bosna i Hercegovina

a.) Izvođač projekta/domaći ugovarač

Adresa:

Sjedište:

PDV broj (ukoliko ga ima):

b.) Izvođač projekta/strani ugovarač

Adresa:

Predstavnik u BiH:

PDV broj:

III Nabavka dobara ili usluga

Prodavac dobara ili usluga:

Adresa:

PDV broj:

Specifikacija računa

Broj stavki	Broj računa	Datum računa	Iznos računa bez PDV-a	PDV	Opis proizvoda ili usluga

Ovjera Evropske komisije

Mjesto i datum:

Odgovorna osoba:

Potpis i pečat: